



Reykjavík 1. júní 2016

Kæri viðtakandi.

Mennta- og menningarmálaráðuneytið og Heimilis og skóli – landssamtök foreldra innsigliðu með samningi í janúar sl. samkomulag um læsisáttmála fyrir foreldra. Áður hafði Þjóðarsáttmáli um læsi verið undirritaður af mennta- og menningarmálaráðherra, fulltrúum sveitarfélaga og Heimilis og skóla í öllum sveitarfélögum landsins. Með undirrituninni staðfestu þeir sameiginlegan skilning á mikilvægi læsis til virkrar þátttöku í samfélaginu þannig að hver og einn geti nýtt hæfileika sína samfélaginu öllu til velferðar.

Meginmarkmið samkomulags ráðuneytisins og Heimilis og skóla eru að:

- Stuðla að aukinni lestrarfærni barna og unglinga með þátttöku og stuðningi foreldra við framkvæmd þjóðarsáttmála um læsi.
- Útbúa læsisáttmála fyrir foreldra og innleiða hann í skólum landsins.
- Auka vitund foreldra um ábyrgð þeirra gagnvart læsi barna sinna.
- Virkja foreldra í að styðja við læsi og lestrarþjálfun barna sinna.
- Auka samstarf skóla og foreldra um læsinnám barna.
- Koma á framfæri kynningarefni um áherslur og samstarf frjálsra félagasamtaka og stjórnvalda við að efla læsi barna.

Með innleiðingu læsisáttmála er höfðað til samtakamáttar og samábyrgðar foreldra. Sáttmálanum svipar til foreldrasáttmála Heimilis og skóla sem notið hefur mikilla vinsælda meðal foreldra (nánar á heimiliogskoli.is). Læsisáttmálinn inniheldur sex atriði um lestur og læsi sem rædd eru á fundi bekkjarforeldra. Á fundinum er efni sáttmálans rætt og kynningarbæklingi dreift til foreldra þar sem farið er nánar í hvert atriði sáttmálans sem eru eftirfarandi:

1. Lesum fyrir barnið og verum fyrirmyndir.
2. Hlustum á barnið lesa.
3. Viðhöldum og eflum færni.
4. Höfum lesefni aðgengilegt og bjóðum val.
5. Leitum hjálpar.
6. Lesum á eigin tungumáli.

Þegar umræður hafa farið fram og foreldrar hafa borið saman bækur sínar og rætt sín á milli hvað þeim finnst mikilvægt í þessu samhengi er sáttmálinn undirritaður. Þannig eru umræðurnar rammaðar inn á táknrænan hátt.

Á haustmánuðum munu sérfræðingar Heimilis og skóla ferðast um landið og kynna læsisáttmálan fyrir skólastjórnendum, kennurum og foreldrum. Það er von okkar að þeim verði vel tekið og að læsisáttmálinn verði notaður um land allt sem liður í að efla læsi barna á Íslandi til framtíðar og styrkja jafnframt samstarf heimila og skóla í landinu.

Með von um góðar viðtökur,

Illugi Gunnarsson,
mennta- og menningarmálaráðherra

Anna Margrét Sigurðardóttir,
formaður Heimilis og skóla